

Privel da faussas conclusiuns tar la NGF?

Adversaris mettan en dumonda las cifras dals aderents

■ (anr/fa) A l'avis dals adversaris da la NGF mettan a disposiziun regenza e parlament grischun cifras intransparentas e nuncumpletas. Tenor els stuessan vegnir resguardadas era las ulteriuras chargias finanzialas per las vischnancas. «Las calculaziuns da la Nova concepziun da la golvaziun da finanzas e da la repartiziun da las incumbenzas tranter il chantun e las finanzas (NGF) grischuna na pon betg vegnir suandadas», ha ditg Patrik Degiacomi, president da l'AvenirSocial Grischun e pledader da pressa dal comitè «Na a la NGF grischuna» ier a Cuiira a chaschun da l'orientaziun dals meds da massa. Els hajan empruvà senza success pliras giadas da survegnir cifras actualas: «Nus avain spetgà che la regenza, il cussegl grond u eventualmain in comitè Pro NGF orienteschian la populaziun detagliadamain davart la NGF e sias consequenzas finanzialas. Fin uss nun è capità nagut, era sche la votaziun è gia en bundant in mais.»

«Grevs temps per las vischnancas»

Thomas Hensel dal sindicat VPOD Grischun ha ditg che causa la revisiun da la lescha d'impostas hajan las vischnancas mintg'onn var 41 milliuns francs damain entradas. Ultra da quai vegnian a chaschunar las revisiuns da lescha actualas (AVS, assicuranza da dischoccupads ed AI) ulteriuras consequenzas negativas sin las vischnancas. «Quant dramatic che quai po esser mussa in studi da l'Uffizi federal per assicuranzas socialas, tenor il qual la pratica pli severa tar l'Assicuranza per invaliditad AI ha manà ada-

quella ch'in terz da las dumondas refusadas da l'AI vegnan sorprendidas da l'agid social.» Ils custs socials che las vischnancas avessan da surprendre pli u main sulettas tar in gea a la NGF grischuna vegnan tenor el a crescer en ils proxims onns marcantamain.

Custs supplementars causa nova lescha da scola

Sandra Locher Benguerel, commembra da la direenziun da la magistraglia grischuna LEGR, ha menziunà ils custs supplementars per las vischnancas causa lescha da scola revedida: «Introdur uras da bloc, structuradas da di e prolungar il temp da scola annual chaschunan custs supplementars, ma er ils locals necessaris per pudair porscher structuradas da di (lieus per mangiar, stivettas etc.) nun èn gratuits.» Era l'integrasiun dals scolars da classes pitschnas en las classes regularas vegn tenor ella a custair. Ch'ins haja vis grazia als resultats da l'evaluaziun en las vischnancas da pilot Tavau e Tusaun che quest'integrasiun pretendia classas pli pitschnas, damai dapli locals da scola. Las scolars vegnan er ad avair dapli sortidas causa ils transports da scolars e la cumpra da material da scola e mobiglia. «Tut quests ed auters custs supplementars n'èn betg resguardads en la NGF grischuna», ha ella constatà.

«Vischnancas memia pauc criticadas»

«Era sch'igl è enconcuscent ch'ellas perdan entradas essenzialas e ch'i han da surprendre custs supplementars na mettan bleras vischnancas anc adina betg en dumonda la NGF», han menziunà ils

adversaries. Els supponan ch'ìls blers represchentants da vischnancas pensian che las calculaziuns preschentadas vegnian ad esser correctas. Cunquai che quai n'è a l'avis dal Comitè Na a la NGF grischuna betg il cas propona quel da refusar ils 7 da mars il project en votaziun «per dar temp als responsabels da reponderar e preschentar ina megliera proposta».

Vischnancas turisticas disch-avantagiadas?

Robert Ambühl, commember dal Kleiner Landrat da Tavau e da l'Associaziun dals cusseglis da scola dal Grischun, ha numnà sco in punct debil da la NGF grischuna la calculaziun dal potenzial da resursas da las vischnancas: «Per calcular quest potenzial vegn resguardà il dumber d'abitants che abitan adina en vischnanca. Cunquai che segundas abitaziuns vegnan resguardadas tar las entradas da taglia, ma betg tar il dumber da persunas maina quai en bleras vischnancas turisticas ad in memia aut retgav da taglia per persuna ed uschia ad in potenzial da resursas memia aut.» Per quel motiv sa pegiurass a ses avis la situaziun da bleras vischnancas turisticas, sche la NGF grischuna vegniss acceptada.



KEYSTONE

Culp da partenza per las elecziuns da la regenza grischuna

■ (lq) La campagna electorala per las elecziuns da la regenza che han lieu ils 13 da zercladur ha cumenzà stersas cun in ar-

ranchament organisà da las pendicularas dal Grischun. En il center da la discussiun cun 9 dals 10 candidats èn la stru-

ras turisticas e cunzunt lur finanziaziun stadas. Cunzunt represchentants da l'economia èn stads preschents a l'inscunter.

NOVITADS DA WWW.RTR.CH

Nua duain ils scolars dal Tessin durmir?

Per ch'il gimnasi da la claustra da Mustér rendia, dovra il gimnasi dapli scolars. Chatter quels en la Surselva è dentant grev, pertge là datti adina damain naschientschas. Uss è il gimnasi en contact cun scolars dal Tessin. La scola vul carmalar cun sia purschida scolars sur il Lucmagn a Mustér. Il gimnasi stat dentant avant la dumonda: I dat sutgas libras en scola, dentant nagin lieu per durmir en l'internet. Ussa sto la scola tschertgar ina schliaziun per engrondir l'internet.

Accident cun scarsola a Lai

En il territori da skis dal Corn Cotschen a Lai hai dà stersas suenter mezdi in accident cun scarsola. Ina giuvna da 16 onns è sa blessada grevmain vid il chau ed è vegnida transportada cun l'helicopter en il Spital chantunal a Cuiira. Enstagl da restar sin la via da scursalar è la giuvna da l'Argovia scursalada sin la pista da skis e n'ha betg pudì franar ed è sigli-da en in pign.

En tge direenziun va Gastro Mustér Medel

La Gastro Mustér Medel ha vuli savair da las pendicularas da Mustér tge che marschi. Ier han las pendicularas orientà la Gastro Mustér Medel e fatg gust ad els per ina separaziun da l'uniun turistica Sedrun Mustér Turissem. L'uniun da Gastro Mustér Medel vegn proximamain a clamar ensemen ils ustiers e hoteliers per savair prender posiziun e decider en tge direenziun l'uniun vul ir.

Posta Ladina en vestgì nov

Mintga gievgia cumpara la «Posta Ladina». Tge ch'è uss dentant auter tar la PL è il vestgì da la gasetta regionala. Nov, auter e meglier – quai èn ils trais chavazzins.

OZ
DIE SÜDOSTSCHWEIZ
 Initiative soll Caviezel zum Landammann machen

Bündner Tagblatt
 Neue Einfamilienhäuser am Rand von Chur

SO e BT pon ins retrair al kiosk



Il cussegl federal vul limitar las imissiuns da gas. KEYSTONE

Cussegl federal fa cunterproposta

Autos che vegnan immatriculads da nov en Svizra duain a partir da l'onn 2015 mo pli pudair stuschar or 130 grams CO₂. Sche quai è tuttina dapli, duain ils producents ed ils importaders stuair pajar ina taxa. Cun questa cunterproposta indirecta vul il

cussegl federal franar l'iniziativa dals «Offroaders». Ella ha pretenziuns pli autas che l'iniziativa dal pievel, che pretenda vehichels pli schubers. Quai ha communitgà il schef dal departament federal da traffic ed energia cusseglier federal Moritz Leuenberger.

L'AURA

Per gronda part bell'aura sur la fin d'emna

Situaziun generala: La zona da pressiuun bassa che ha influenzà ier l'aura tar nus s'allontanescha vers ost. Dal vest arriva ina punt da pressiuun auta che sa stenda da la Spagna sur las Alps fin en Russia. Oz: L'avantmezdi anc nebli cunzunt en la Svizra orientala ed en il nord dal Giura. En las ulteriuras parts ed en las muntognas sulegliv. Levs vents. Prognosis: La sonda en la Bassa per gronda part nebli, en las muntognas ed en il sid bell'aura. En in decurs da la dumengia nebli ed urizis cun in zichel naiv. En il sid per gronda part sulegliv. Glindesdi e mardi variabel.

